

寶

綸

堂

詩

鈔

寶綸堂詩鈔序

作詩之旨謂有妙悟則可謂不關學問則不可司空表  
聖流鶯比鄰之品嚴滄浪羚羊挂角之論其實不過妙  
悟而已如云詩有別腸則枵腹操觚鉸釘補鍋者皆可  
從事豈足以上擬雅頌之遺乎台州齊侍郎息園先生  
少年以選拔科中副車因入天台山讀書十年遂膺博  
學鴻詞之薦出入著作之廷備顧問教歷有年故其  
發而爲詩皆沈博絕麗宏偉秀彥非山澤之臞可比蓋  
所積者厚故其流者光其取資于深造自得者不可謂

不多矣夫侍郎之學其大者乃在經史今武英殿儲

藏版本如十三經二十四史侍郎均有攷證天下學者

因是以知稽古之方又文集若干卷無錫秦侍郎瀛已

選擇其要者刻之而水道提綱一書尤生平殫心之作

亦既風行海寓矣惟詩集人所罕覩者非靳之也侍郎

固于詩爲餘技則人亦以其所後者後之耳然同時掉

鞅詞壇若胡雲持天游厲太鴻鶚杭大宗世駿嚴崧占

遂成皆能有所表見于時而獨于侍郎之詩闕而不傳

誠不足以厭學者之心也今戴廣文殿海復取其全藁

編次六卷業旣成來請序余因歎作詩之道不可不本  
諸學問侍郎之詩不必盡見其學而論學問者轉可以  
侍郎之詩見之則徒恃妙悟者奚爲哉其中如憐忠寺  
二首相傳侍郎入京時忠肅以易儲奏疏檔案見託所  
謂因感異夢者卽此昔大興朱文正公視學兩浙時爲  
作詩篇勒諸西湖廟壁而余亦嘗與孫侍御頤谷尙論  
及之此非作詩者學問精能之至使鬼神來告耶此可  
以窺侍郎之詩而爲天下之善學問者告矣

嘉慶十三年九月浙江巡撫揚州後學阮元序

寶綸堂詩鈔總目

卷一

古今體詩五十二首

卷二

古今體詩四十七首

卷三

古今體詩五十一首

卷四

古今體詩五十四首

卷五

古今體詩五十首

卷六

古今體詩六十八首

寶綸堂詩鈔卷一

天台齊召南次風謨

詠蘭

崇蘭生幽厓遙隔千仞岡秉性本高潔豈隨百草黃  
凌寒葉青青飽經雪與霜早春含微陽空山自芬芳  
安知風遠聞自古稱國香香旣滿坑谷又滿君子堂  
素心雖不言綉佩寧非傷寄語培其根灌溉無炎涼  
日夕汲清泉九畹茂可望

讀書二首

我生百不諳覽古得真樂親朋笑專愚謂徒拾糟粕自  
覺對前哲雙眼滌齷齪惜坐空山中篇籍太簡約每思  
吏集賢祕書抽館閣然後隨向禽逍遙遊五岳

撫卷常自恨不生千載前展卷復自喜生晚見其全今  
日所讀書古人半未詮百家羅庖星六經日麗天儀象  
始漢儒圭臬備宋賢我畱但力稼自可慶豐年

莫相疑行

鳳凰豈不飢不爲稻粱遲仙鶴豈不棲不於枳棘卑松  
柏雖芳春羞同桃李姿巖巖泰山石萬古誰能移結交



匪心交面好亦何爲長揖語君子結交莫相疑

題畫用康樂道路憶山中韻

繡壁濺羣瀑合飛勢漸緩水口迴層巒峭削如岸斷茅茨四五家籬落曲以款幽人此間住好風滌煩懣桃源理或然與區事非誕繞徑柳毵毵依牆棗纂纂接筒引流長疊石架橋短孤亭當翠微修竹森千筍遠岫靄微嵐鳴禽樂暄暖飄飄攜琴客巾屨亦閒散問渠胡不彈清音勝絲管

題畫鷹

畫鷹妙得猛士氣虛堂鳥雀遙爲避眼睛啖啖交電光  
養勇枯枝怒猶未翻如刀劒爪如鉤雄者將軍雌能吏  
一俯一仰神軒昂百發百中本容易斑斑細點鐵作衣  
逸才那受韉條繫秋原自獵搏高風擊落鴛鵝碎空際  
虞羅巧設安可致扶雲絕海快遊戲若問北白與東青  
駿物天生詎論地良工摹寫窮毫毛何處看來閒坐勢  
楚公擅名侍郎繼東丹國王亦偉麗多畫翻騰盤攫時  
誰解整暇蓄長技我有一語舉似之垂綸老叟溪邊意

評選詩十三首

英英出岫雲依依映春柳蕭蕭清秋夜離離耿星斗百  
感浩茫茫曲曲向誰剖人生際會難出處沈吟久風當  
正變間心接楚騷後長言復永歎纏綿寫忠厚好繼三  
百篇其惟十九首

龍門好奇者國士目李陵陵乎爾誠能才勇非虛稱柰  
何立身敗更復說子卿爾罪通上天武節完堅貞當其  
贈別時遙調金石鏘兩人相倡和如鳳雌雄鳴水流無  
泥沙焉辯渭與涇武歸作歌送泣涕如雨零惜哉邈未  
錄但取五言名吾聞詩立敎大義取勸懲誦彼兩人詩

分明可以興

東京少歌詞平子推獨步我誦四愁詩高于兩京賦託  
興本風騷微婉世不悟榛苓思美人千古有餘慕

建安盛五言作者氣森爽王劉並揚鑣子建爲之長天  
才振雄筆風流何倜儻上下數百年神駿渺無兩情深  
質自文骨秀韻含響雖非神僊人拔俗已千丈

建安旣不再竹林發清音洗去塵埃腸悠然莊老心禮  
法旣莫拘嘯咏隨登臨阮公最跌宕松風飄衣襟

雲間奮二陸行空見天馬當時諸賢豪並出土衡下吾

謂風力勁實亦不如左試觀咏史篇儻父呼詎可

安仁美姿容文采亦超忽一語吾笑卿如卿宦非拙白  
首同歸時望塵悔拜謁令色與巧言詞章固爲末

景純遊僊詩古樸露文采能于淹洽中意境闢磊磊大  
義折王敦白刃延頸待斯人僊之徒神當遊山海

晉有陶先生自然乃入妙何曾鬪才思亦非矜格調性  
情之所流天籟發萬竅篇篇皆國風淡宕含奇峭澄湖  
漾初月遠岫明斜照身隱焉用文嗜酒埋光曜文選嗤  
閒情真堪付一笑

謝氏鬱多才康樂最矯矯豔麗人所珍刻意人所少山  
水換老莊陳言豈得擾屐齒恣冥搜置身峰縹渺得意  
必清新境則曠而杳光祿且不如淥水芙蓉曉駢偶能  
若斯是曰出羣鳥

大陸妙擬古文通尤端詳優孟豈不似所恨非衷腸擬  
古取大意何必錙銖量所以江左後總難及李唐

聲調日靡然明遠才獨健驚鳥摩雲霄逸足逐雷電悲  
歌溯越石有氣軼公幹若論七言詩此子開生面

心聲貫古今時代殊寒暑五穀固常餐果實亦可茹何

必寒衣裘卽笑葛與苧惟有四言詩竟難續前緒韋傳  
諫其君束生依舊序鐘磬儼在懸考擊猶齟齬何況雜  
俗樂知音肯浪許刪後更無詩前賢有斯語

與諸友論詩

大塊鼓噫氣人生暢歌詩若問此道始便起畫卦時何  
以明其然作樂肇庖羲書曰詩言志志有歡與悲歡者  
必舞蹈悲者必吁噉若春夏秋冬潛使萬物移風雷發  
天機蟲鳥孰教之何況五行秀含情靡所思古來大作  
手管見厯厯窺觀止歎簫韶九成代鞭笞吾意勸勿壞

帝臯親自爲南薰及復旦賡續創瑰奇如氏謠諺傳五  
子述箴規殷商有名頌嚴肅不可追兩間郁郁文元公  
獨主持雅頌鼓大音緯地經天詞幽風點瑣碎萬象呈  
朝曦多多乃益善公外更數誰惟餘太保爽左右效偏  
裨下至中興日彷彿成康遺召虎吉甫筆磊落典冊垂  
河流奔百壑嶽立壓羣卑崧高何雄傑板蕩劇咨嗟是  
皆神聖亞行輩少肩垂凡經輶軒采髦士異烝黎淇泉  
思衛武閼宮侈魯僖雖非二南匹論世每在茲素王操  
選政燦如演耦奇興觀詔及門得所訓樂師大可調黃



鐘細亦叶參差正變各有聲隻字奚能訾粵自秦火後  
羣言多我欺漢魏尚高古鐘鼎光陸離黃初及西晉猶  
足稱尊彝江左風靡靡六代弱以疲李唐始振拔繼周  
宜首推可惜宋元來議論紛紛貽擬遜日猥雜角勝步  
與騎英靈間氣編同異交致疑浮芥堂坳中豈識天有  
池未陟崑崙巔安審兩戒岐言者心之聲意逆常自怡  
繩墨準三百豁然雲霧披大致苟不異何妨異其辭蘇  
李悵離別淵明樂棲遲子建兼文質變風猶依依少陵  
優入聖大雅醒世迷太白飛僊乎雲霞凌空馳子昂感

寓詩濯濯瓊林枝韓公抉雷電光燄流烜熙可得十數  
家豪逸服峨帽餘皆在其下味別醇與醅常想作巨碑  
龍文負以螭甲乙仿記室品題勿浪施厯下竟陵書一  
笑同兒嬉因君談亶亶聊與言惔惔平生奉聖謨信于  
契元龜詩就吟向天秋鴻方漸達

曹源書屋初成得詩六首

葺廬

習靜宜山深賫糧苦僮僕城居地卽偏關關終滿目難  
於彈丸中得此數間屋溪浴烏石清徑遶莓苔綠負郭

遞水田循牆蔭灌木不愁嵐氣侵已覺囂塵伏吾祖愛  
諸孫授經始門塾意取有穀詒宅向無隣卜去家不數  
武定省便往復修葺始今春鳩工頗神速衡門俄改觀  
棟宇似新築教以惜分陰琅琅展書讀

掃地

幼儀夙所嫻灑掃趁朝日況今書屋成正值月之吉牖  
戶徧綢繆塗墍工初畢山拱簷幽幽溪臨階秩秩閣淺  
不礙眉軒舒足容膝依窗橫淨几拂蠹整古帙浮埃未  
盡蠲天機豈洋溢屑學陶公貯穴如幽人室雖居蓬華

陋已勝神仙窟前賢逆旅中操帚未敢逸王微坐凝塵  
無乃太簡率丈夫志四海先當除一室

除草

學道先去私洗心淨煩想如何草不除窗外儼蒼莽但  
餘人跡存空闊匪尋丈戶庭蔽荒穢虛蒙雨露養近水  
蛙引羣春宵競荅響我非蓬蒿隱寧作鼓吹賞滋蔓恐  
難圖納涼必軒敞欲尋風月清行吟地須廣呼童芟根  
株俯仰頓開朗勞以酒一壺時時記疇曩豈待鶩駛鳴  
佳氣得秋爽眼中俗物空能令道心長

種花

空庭捲榛蕪已快塵慮屏種花莫後時乘此春日永難  
得養花天雨過含微冷弟兄各有趣集事在俄頃近砌  
植蘭桂迎陽列桃杏古梅來水濱怪松移峻嶺野卉紛  
成行斜斜復整整忽向書巢邊時闢文章境晨看露未  
晞夜燕燭方炳風迴筆硯香月寫紗窗影鳥啼人豈喧  
蜂遊院逾靜從茲澆灌忙持綆汲深井

栽竹

求友得此君天然備三益直諒絕浮華多聞萃簡冊愛

詎始子猷貴重自古昔軒轅制律呂元音首金石實待  
靈禽餐象應春雷圻美箭挺森森文武任所擇我今植  
窗前娟娟羅几席畝勝渭川千竿過庾園百解籜雖蕭  
疎拂雲起尋尺品高心自虛節勁氣不易相對如名賢  
翛然共晨夕長歌思衛武手卷那堪釋

檢書

邑處千巖中仕宦久衰謝誰將西山藏高插鄴侯架不  
過數舊家猶堪一紙借斷簡亦零星白魚多羽化癖性  
自弱齡掌錄遍鄰舍閱肆羨仲任懷餅思叔夜未破萬

卷書豈長三都價俗士禱奎文虔恭並軍禡曷若陳聖  
經稽首拜庭下旁羅子史集遊覽無冬夏巨川涉江湖  
喬岳攀嵩華歲除計厥功報禮等八蜡

窗前遠岫

愛此數峯秀翛然窗外秋青銜天入硯碧吐月當樓且  
得支頤樂長消隱几愁若爲凌絕頂一粟渺滄洲

台山九仙歌

言神仙於天台是亦圭璧之崑岡駿馬之冀北  
矣書傳所載遠引旁徵王喬茅盈之掌治不過

神遊劉晨阮肇之重來終如夢幻其餘如王思  
眞陰長生張皓劉根袁根柏碩班孟魏夫人王  
元甫鄧伯元許邁羊情夏馥褚伯玉汪子華謝  
自然王可交許碯王旻厲歸眞左元澤白玉蟾  
等或流寓而非常居或傳聞而無實據者豈少  
乎哉自葛孝先以下得九人焉皆有蹟留至今  
非道成於台山卽生長台山及久居是地者也  
緬惟高致各爲一歌

葛孝先

吳人居桐柏成仙赤城華頂皆有其跡



仙公職司太極左芝蓋霓旌森旂旆華頂長留茶圃雲  
赤城猶熾丹爐火當年朝斗拜瑤壇老君下賁從仙官  
自從沖舉跨龍去山中猿鶴吟風寒願隨仙公遊襟懷  
一高曠圖佩五岳形翔翔九天上

白雲先生

晉人居華頂

萬入峰頭多白雲先生身是雲中君白雲去天纔一握  
先生身是雲中鶴無心舒卷雲性情性情所寄卽姓名  
傳聞王右軍黃庭得筆法不圖白雲翁翻工墨浪潑墨  
池到今草簪之白雲終古無盡時先生在焉呼欲出隨

風飄飄莫能及

徐則 隋人居石橋

辟穀潛深山羞爲時所薦却憶真人言不見晉王面委  
蛻白日風蕭蕭歸去安知千里遙舊山隱處呼弟子指  
眼看予度石橋

王遠知

隋唐人居台山傳潘師正再傳爲司馬子微

天台舊是神仙宅丹經得自陶貞白生平漏言注周易  
神官下遣六丁賁雷電霍霍取其籍行地逍遙年過百  
休慕飛昇兼拔宅天上紛紛官府多不如少室稱仙伯

寒山子

唐人居寒山明巖洞常至國清寺與豐干拾得遊

寒山子居寒山題詩多在溪石間國清日日往復還是  
佛是仙總玩世當時頗目爲癡頑荷衣蘿帶樺皮冠竹  
筒飯瀹欣加餐拍掌大笑對拾得狂歌騎虎隨豐干豐  
干饒舌竟何益作禮文殊太相逼闍邱策馬馬驕嘶嘶  
入寒山萬尋壁

司馬子微

唐人居桐柏山

仕宦有捷徑神仙無俗塵高隱金庭上悔作應詔人泥  
丸童子聲振玉廣成數言帝三復拂衣徑自歸天台身

在赤城名丹臺謝女求師泛海迴桂堂時見黃雲來抱  
膝書成坐忘論堪憐十友居塏全祇有謫仙解賦鵬惜  
哉天才爲酒困

夏侯隱

唐人遊台山甚久時號睡仙

睡仙夏侯人之靈神遊山水真忘形閉目齁齁脚不停  
登山渡水全未醒越險何間澗與陁但聞鳥語兼花馨  
露宿勝于洞戶扁夢中時乘風泠泠飄如孤雲遊天青  
黑甜別有金丹經十洲三島等郊垌帝所廣樂隨時聽  
笑醉鄉人藉酒餅

張鴻濛

宋人陳希夷弟子廬于瓊臺

鴻濛子廬瓊臺還元功就成嬰孩殿廷講易不受職賜  
歌一闕歸天台希夷清操在高臥弟能如師名自大至  
今猶說仙人座

張紫陽

宋人生于台州瓊瑤街而有句云吾家  
住在石梁北蓋未遊蜀之先嘗居山中  
也

紫陽傳金丹神超形亦妙返本觀乾坤近取得二曜元  
牝凝天真大藥非物料道成叅瞿曇兩鑑同一照南宗  
仙派公所闢從契論中解周易雲在山月在天寄語人

人皆可仙惟清惟靜形神全未會道德五千字請誦悟  
眞九九篇

偕咫尺亭入山暮抵高明寺

山深雲霧迷將昏已如夜金地銀地間岡巒莽岐汭覓  
路落葉中颯颯令人怕松竹寒蕭蕭驚鳥啼啞啞大石  
猛虎蹲尖風長弩射招提邈何許咫尺如岱華誰知一  
彎環鐘聲在腳下稍見佛燈明林端露微罅寺門久已  
扃恍惚看古畫老僧秉火出相對各深訝

登赤城中巖

夾路水淙淙登臨興未慵  
雨花凝穉竹風梵度長松  
古洞燒丹冷高崖溼翠濃  
漢家標赤幟還見白雲封

阻雨宿天柱峰

峯自柱青天低看九點煙  
適來風雨合惟向寺樓眠  
山隱空虛界人遊混沌前  
會須凌絕巘撥霧待羲鞭

華頂峯觀日

天自燒丹采山如繡紫幢半規環  
大地一髮引長江  
鳥展輪中翅螺浮海外邦  
不知金嶺下曾否豁朝窗

瀑布

名自興公一賦傳來從桐柏九峯巔天孫雪練傾河落  
海客冰綃映日懸機杼有聲轟霹靂丹青隨意寫雲煙  
匡廬浪說三千尺爭及台山萬丈泉

遊桐柏山觀新作道宮詩以代記

雍正癸丑仲秋

秋作桐柏遊聊亦豁胸次攜弟曉出門列岫晴空媚西  
郊及西成長幼勤穡事憑憑打稻聲搢搢刈禾意田叟  
指朝霞戒趁雨未至壯者操短鏹老婦手長筭喚兒守  
車箱聽客執斗概簸蕩背風颭分布迎陽曬牽犢嚼斷  
稽驅雞啄遺穗野賽栽草冠藉茅拜表暎幸值年穀豐



艱辛却容裔平疇轉山麓畧徇跨水滋伊昔鄭尹賢千  
載人歌思陂塘映烏柏籬落窺綠穠橘柚與棗梨丹黃  
爛彩厠赤城漸迢遙碧嶂橫空礙十里到其下瀑布落  
天際三井窟蛟龍千仞澁紫墜影搖白日寒沫濺穹石  
沸震耳轟輶輶潑面眩滂溽將無銀河翻恐是雷車掣  
飛雪春不消懸冰夏猶滯崖危快奔騰樹怪助聲勢之  
而爪甲奮欲攫神魂悸仄尋赤烏觀還覓元嘉寺拍掌  
空有巖飛白已無字數家臨水口結構枕屏翠客從澗  
上來犬向雲中吠芳蘭茁竹根鳴鹿逐羊隊杳然塵慮

忘不與人境類有姪前致詞一飯劇容易香粒炊雕胡  
玉糝下鹽豉爲憶王山陰當日嘗此未腹果起登山膚  
寸驚嵐氣宛轉厯崎嶇岌岌怵峭厲壁削螺紋纏岸欹  
鳥道避九折何逶迤一折汗先喘層巒黑于墨苔蘚幻  
古卉仰觀工運夫遲遲移蒼蔚一石千人扶一木百人  
曳任負各隨力低昂軒且輓繞樹萬蟻行上牆百足跂  
督率煩有司止齊聽次第許邪並發聲谿衍應巨礪前  
者見踵趾後人平肩背斷續陟重霄稀微稊米細道傍  
堆盤陀礪礪蕩荒穢斧鑿仗五丁來往容並騎困輪蒼

髯奴張蓋同郵遞弟告足力疲予亦欣坐憩自謂所歷  
高安知更不啻踰時始及巔靈境聿瑰異倏見雲潭潭  
豐隆召屏翳洗我衣上塵敝我腳底屣天闕複層城仙  
宮在平地迷茫煙雨中棟宇益清閼煒煒紫金屋瑩瑩  
白玉砌閒闔巍闔闔洞戶敞幽邃瓦淨碧琉璃梁煥紅  
玳瑁繚垣象紫微樓居接上帝懸圃卽眼前蓬萊非海  
外崢嶸蜃氣噴合沓魚鱗萃青羊未云侈黃鶴遜鉅麗  
將作借月卿繪圖命星使物不取民間匠皆徵絕藝公  
輪操樸斲獲人執塗墍呈材繩榱桷刊隙闢薜荔礱石

華軒楹雕瓊飾埏埴畫堵定規模毛髮按位置廣殿方  
經營鳩工日可計緬維越金庭夙稱王喬治法輪肇葛  
翁降經發瑤笥有唐司馬子應詔悔輕出班秩東華崇  
心源廣成契天家爲築宮慶雲史稱瑞前推崔尚頌後  
傳元相記福地萃羽流厯朝俱覆庇提舉多名賢器物  
皆敕賜不圖勝國末古觀竟頽廢僅存乾道碑但有僕  
射祠宅拔留空山榛荆莽茵茵神仙亦待時欣遭昇平  
世謂台本名山宜復古之制民果慶有年甘霖屢汪濊  
循覽頻低徊陰雲稍開霽娟娟九峯秀濃翠巾衣袂緩

步竚新橋涼颼浩颼颼女梭流溶溶琮琤憂環珮雨絲  
裊悠揚山景澹工緻陵阜象印劒草木森芝桂回頭顧  
采藁碣礧千靈對言旋及微晴嶺頭換舊扉霧散情更  
怡地曠目無蔽極望百里餘飛鳥入決背衆壑埤穴明  
羣峰棋局視陰陽互糾紛窪突錯經緯遠矚岡巒蹙近  
睹峻嶒積有鉤如鷹背有豎如鳥翅有方如架書有圓  
如累甄有整如魚貫有散如兒戲有拒如鹿角有引如  
猿臂有如特拖犁有如馬縱轡有如螭蜿蜒有如鼇鼉  
鳳有如熊羆立有如虎豹偁有如旅有先而如帥

有倚而如倦有行而如跛有怒而如搏有喜而如睇有  
偃僂如揖有頽放如睡有尊嚴如神有左右如吏有如  
擐甲冑有如豔冠帔有如陳几筵有如羅翼衛有如擁  
旌麾有如綰雲髻欲說又忘言得心任罕譬錦繡巧組  
織煙水妙點綴刻畫杜韓詩抒展荆關繪因歎造物能  
所爲殫神智弟敏章累成予拙思多泥惜哉滂沱阻行  
吟覺勞瘁瓊臺指顧間展齒猶難詣勝賞詎有窮再遊  
早相誼來春厥工竣快俟

龍章賁

桐柏山夷齊二石像歌

君不見唐時桐柏開仙宮瓊樓瑤殿戟蒼穹殘垣斷碣  
俱羽化斜陽一帶青山空又不見宋時汴京營艮嶽驅  
神役鬼高山作銅駝轉眼荆棘生花嶼飛去金明涸塵  
看海水池看灰富貴神仙安在哉濟枯河徙且莫定何  
況金寫鐵鑄能無摧我羨古賢墨胎兩片石宣和宮中  
至桐柏爾來于今七百年堅貞不受兵火厄瑩如古玉  
出土色襟裾歷錄苔紋織稜稜瘦骨困餓餘神嚴氣壯  
鬚髯直背鐫小篆號夷齊斲自何年渾莫測點蒼震澤

潔不如扣之鏗鏗似靈璧幾遭破屋封雪霜幾經野燒  
捲霹靂到今廟貌重鼎新春秋俎豆虔厥職鄉人過者  
正衣冠歲時薦蕨表胸臆逸民清聖好頭銜九天僕射  
詎榮錫台嶺長欽百世師左右忠清羅弈弈祠舊名九  
天僕射歲  
久將顏郡守張公聯元新之巡撫高安朱公題爲清聖  
祠總督覺羅公滿保采史志台郡忠臣如二徐方正學  
王靜學等共三十人配享兩廡吾邑有六人吾七代祖  
駕部忠節公諱汪其一也嗟哉高風起

懦頑遂令遺跡爭人間蒲坂偃師各有冢海皆北海山  
西山茲石何幸遇巧匠託名孤竹留塵寰則知綱常不  
磨心不死像應終古無毀理嗚呼願爲太尉與太師藍



田青石當如是

雪中望赤城

同雲莫掩萬尋霞，晃朗迷離極目斜。  
三島蜃樓浮海浪，九霄絳節點天花。  
嶺邊竹尚舒寒翠，洞裏芝應長瑞芽。  
便擬乘風披鶴氅，玉京深處覓丹砂。

登華頂峰值雪用張祐遊天台韻

曰予陟崔嵬，杳然入太古。  
誰謂大地山，必奉崑崙祖。  
昔聞父老言，峰顛殊下土。  
罡風無四時，哈呀嘯萬虎。  
孤標擢泱寥，左右伏弼輔。  
觸石雲氣合，離朱目猶瞽。  
陰霾三

百日晴或六十補倘失清爽時登者每深苦青蓮古謫  
仙借夢遊天姥我今當九月攀路日方午仰見黑雲飛  
山腰先大雨其上乃積雪皚皚百堵茅菴一龐眉相  
值話賓主阻予弗復行予偏自矜詡閱盡兒孫班應亦  
睹其母拂衣衝寒出雪徑覓細縷礪砢地上冰碎作齒  
牙豎蓬蒿深沒人如刀又如弩縱橫銀爲鋒銛利森可  
睹同雲漲鉅海孰辨岳有五眼中絕點塵僧陪浪揮塵  
灑灑元氣游闔闢乾坤戶清濁未剖判意象差足舉更  
上躡危磴步武儼規矩不知拜經臺別是清和宇皓日

麗碧穹光輝照叢莽仰天近可捫觀地遐莫俯玉田浩  
茫茫擎此紫金柱入雲更出雲沆瀣吸天乳四萬又八  
千古從何處數

雙溪山房歌贈咫尺亭

前溪後溪流向東前山後山蘊碧空山環水匯得平地  
雙溪山房當其中吾友新遷非舊卜古書應向名山讀  
徑來相別去匆匆呼我作歌擬盤谷雙溪記得昔遊曾  
無數雲峰猶在目東北華頂西石梁頂看海日梁飛瀑  
兩地經過暫息肩溪水清香手頻掬小潭見底躍鯈魚

深林隔霧行麋鹿村落寒多雪未消幾樹桃花夾茅屋  
居民采藥兼采茶沿山萬頃森修竹家家燈火照黃昏  
織筐編箔排蒼玉君今居此遠塵俗釣水樵山清興足  
歡溪察嶺望非遙千秋風韻猶堪續若問捫蘿造訪期  
期在明年春筍熟

月華詩

山中華月夙所聞身獲觀之喜忘殫時也丁未虛危昏  
十六始望懸銀盆碧空如水湛不渾寒光潑地露氣繁  
中庭步翫鮮友昆三冬欲到經方溫中宵渴睡驚其魂

有聲落枕雷霆奔披衣啟戶耿當門仰見青霄羅錦斐  
流虹數匝環冰輪朱黃蒼白兼元纁紺紫碧綠紅與駟  
若煙非煙雲非雲佳哉郁郁復紛紛誰其繪此疑天孫  
七襄織就獻帝閭帝御華蓋七寶旛駕遊月殿開瓊尊  
素娥皎潔霓爲裙羽衣起舞仙仙翻或奏下界聞笑喧  
勅張錦幙周四垣持傲媧女煉瑤琨補天之處尚有痕  
不如爛熳隨靈氛圍繞桂樹培天園是夜月在長羅宛  
胃近天園  
宛夾兔蹲蜃結樓臺何足論憶予八歲夢中吞仙人引  
手扶兩顴未若對此興高舉思日五色古有言復旦歌

虞縉雲軒空山硤硤稽典墳

皇調玉燭熙乾坤觀文成化赫以烜安得賡載隨凱元  
草堂咏物詩次陳尺亭胡恭士倡和韻

蛙鼓

都官居處水盈窪兩部淵淵徹夜撾敲斷池塘牽夢草  
催齊邨落笑人花聲連蚓笛喧春社拍合鶯簧報早衙  
可是君侯曾式怒中田振旅故相誇

蛛網

簷溜無魚亦自懸多因曬日廢臨淵縱橫不用三驅祝

經緯偏誇八陣全  
風罨落花紅出海  
月搖秋水碧連天  
漫言智巧蠶應讓  
網罟能開太皞先

蟻陣

眼中寸土見紛紛  
黃甲烏衣各一軍  
衆力爭先知搗穴  
微軀至死不忘君  
溝橫短芥浮兵檻  
風掃纖埃結陣雲  
戰勝南柯同入郡  
分羶次第策殊勲

蜂衙

斗城有主肅羣囂  
旦暮傳呼走百僚  
尚食獨供仙掌露  
舞衣多學楚宮腰  
暫時戲水爭隨仗  
無日含香不上朝

忽聽雷聲喧合殿可知令節慶花朝

題鄒晴川禮部畫冊

初日芙蓉繞閣香  
縠紋斜皺過鴛鴦  
一灣便好名消夏  
不捉蒲葵也自涼

寶綸堂詩鈔卷一



寶綸堂詩鈔卷二

天台齊召南次風謨

詠古雜詩

魯連好奇計而非戰國人少年折田巴雄辯已入神救  
趙實尊周口吞虎狼秦功成拂衣去義氣播千春公子  
不能容諸侯安可臣周亡六國存日見置郡新孰能撓  
其鋒稱帝尚逡巡名虛三十載魯連威猶伸

漢初多高士豈特魯兩生先有倉海君卓識首羣英又  
有黃石公不傳姓與名三老祇一言問罪大義成四皓

祇一出儲位安無傾未聞受爵賞稍爲塵累嬰蓋公亦  
蕭灑齊相虛堂迎師席坐受拜清靜人自寧桃源避秦  
客早已攜弟兄應笑此輩愚未能容俗情

賈生明王道薦拔有吳公眼力較漢廷絳灌皆愚蒙西  
蜀多學士開教自文翁能于孝景世先有尊經功二守  
眞賢守千載欽高風惜哉史傳畧不與龔黃同

崔巍萬仞山下有萬仞壑高深相倚伏盈虧紛以錯東  
京尚氣節羣賢甚超卓胡爲矜流品齒牙淬鋒鏑用壯  
聖所戒魚龍烹一鑊宇內黯無色正直慘靡樂遂使魏

晉後士風爲懦弱世務何足云揮塵渺寥廓吾謂何王  
輩俯由黨人作羨彼明哲翕雲外翔獨鶴

京房明術數亦因術數窮嵇康知養生養生終無功惜  
茲曠世才竟爲悔吝叢神鬼惡高明崖石危穹窿皦皦  
耀羣日多才能無凶孔雀羽則佳不如冥冥鴻

丹穴有靈禽其名曰朱鳥文采煥九苞搏風入天表時  
亦向人寰遊戲凌縹渺本無顧戀情虞羅安得擾鄴侯  
師子房偃骨遂輕矯

建中再遷播陸相隨流離山東聞詔下折戟涕交頤始

信三寸管賢於十萬師中年登政府不憚龍鱗批嘉猷  
必入告謨訓可並垂賢相數姚宋奇正公兼之所際迴  
不如所學竟奚施知人宜論世吾爲重嗟咨

漢有黃叔度隱居未嘗仕唐有元紫芝但令魯山止事  
跡旣蕭然語言亦寡矣當時諸高賢卓犖少倫比一見  
各誠服贊歎不能已何以感人心德性完粹耳置身夷  
惠間寧非古君子實行無虛聲聞風尚興起

慈水鄭義門性來訪鄭自稱五岳遊人於海內名  
山已十遊七八將自台溫南歷武夷以還舊隱

遊名山川亦有數采眞濟勝擅全具五岳遊人眞快哉  
行年七十猶童孺手攜竹杖銘南雷晉楚齊秦遞流寓  
義門禹梅公子其杖卽黃梨洲遺物既貢成均當選辭不赴有志重編山海經無心

更研京都賦胸羅萬卷輕一官高懷肯爲浮名慕西從  
岷嶓到峨嵋南抵瓊崖北句注洞天福地古雖稱荒僻  
幽奇人罕恬鳥道虛盤猿狖宮神工不劈雲煙路雪嶂  
光搖朱夏寒水簾珠灑青霄雨虎豹何曾當道橫村氓  
亦鮮留賓住攀蘿捫葛踏欽崙似拔蟲魚披竹素先賢  
題刻佛老踪往往爭新已成故堪嗤俗客心如鷺踏險

奔趨罔回顧蠅頭細利眯雙瞳好景當前隔重霧鄭君  
好遊同好古滿腹山川分四庫岳鎮海濱每經遊記序  
歌謳隨興作四明本與天台鄰天台久悵來何暮談天  
就我指烏兔廿年處處周芒屨尚平早畢婚嫁期謝客  
寧愁民吏怖一瓢一笠挈一僮但逢水樂聽韶濩太初  
宦轍似未環不止荔支缺詩句今向霞標拜葛翁求仙  
非爲燒丹誤青精有飯飽啖之將遍甌閩覽懸圃與君  
共散庭前步茅屋看山幾迴互沽來新醪晃金波三更  
月上扶疎樹扁舟何日訪慈湖臥遊盡得琴中趣

乘桴卽目三首

乘桴勝乘舟下水更輕巧眼無篷席遮始快雲山飽晨  
指丹邱麓天星挂畢昴鳳林尚隱隱鴨頭明稍稍溪流  
雖浩然灘高勢全拘濤湧珠亂跳石轉豆初炒忽見澄  
潭長煙波恍三泖汀沙白於雪篆籀印鳥爪隊送羣魚  
忙似避鷓鴣擾漁歌出遠村應和雜蠻獠最愛鬢髯峯  
羅羅照清皎我欲語篙工好景休頻攪

東橫山古名丹邱下有鴨頭石

至此溪流始折而南鳳林山在其前數里

飄飄過急湍乘桴亦云樂壘嶂飛相迎翻恨不得泊陡

聞滂瀉聲殷地雷雨作篙工先動色相戒驚魂魄將及  
僊人潭灘名大小惡峰峰尖入雲怪石堆山腳石類濫  
湏危水似贛江落奇鬼森髯髻刀劒厲鋒鏑又如銀河  
星隱見遙叅錯七里轟奔濤前賢豈能鑿褰衣各徒步  
緣崖度絕壑迴看逆水桴銜尾牽竹索欸乃呼上瀧十  
步仍九却蕭然復安坐出險喜對酌

百步嶺下俗名仙人潭卽唐人詩所

謂惡溪也舊傳王右軍嘗書突星二字刻石上宋明兩代屢經剗鑿而危險依然溪不用船因此兩灘也

出險地尚幽到江勢纔展計從百步下潭深復灘淺問  
名半可言圖誌難細闡帶繞綠玉簪已經千百轉大山



又突兀插天雲初捲西見仙溪來夕陽明絕巘曲嶺盤  
崚嶒碧樹平如翦正遇晚潮生天風泠然善澄泓停不  
流持竿且游行魚鱗喧浦澈通波接微呖瀾漫失沙岸  
鷗鳬逼苔蘚稍平筏復行浮海興堪遣州城跨巉巖島  
嶼當沆演萬雉斜低昂雙峰遙可辨登陸嘯且歌畫稿  
得數卷

百步嶺訪張紫陽遺蹟賦示同遊

百步之山列翠屏百步之瀨名突星嶺頭踞石俯溪水  
鏡中影寫芙蓉青共說神仙紫陽子此間委蛻遊滄溟

至今崖草森指甲山椒猶卓小茅亭與君披榛瞻石像  
詩碑臥草花風馨適見老鶴集松頂將無華表千年丁  
我聞紫陽勤學道萬里尋師遠搜討成都佛寺遇海蟾  
金液還丹傳不老秦蜀遨遊幾十年含毫著得悟真篇  
易老陰符發局鏑龍虎叅同映後先磊落南宗第一仙  
出入造化凌雲煙化後猶晤劉廣益作書親授馬自然  
鄉里傳聞何不一魚羹頓悟揮刀筆當時接引賴鹽仙  
碧潭浴罷紅塵失街名瓔珞記台州州城故宅紫陽樓  
樓邊父老多能說曾是仙踪幾度留我將此事問老鶴

記得傳聞事果不鶴聽人語但清唳翩然矯翮如雲流  
神仙心跡且莫測欲探瓊笈身無由洛誦遺詩下山去  
紫陽面目依稀遇君不見餘霞綺染千峰樹

謁十忠祠

祠祀建文忠烈吾部自方正學王元采至鄭蕭縣共得十人可見台學從南宋

以後人皆崇節義而重經術致有小鄒魯之稱

握衣景先賢手掬寒泉酌前義巾子峰蕭然凌沆瀣郡  
當有明初節義冠宇內乾坤浩氣存台岳並華岱燕藩  
兵犯闕誅錯吳楚悖時運鼓其鋒都城中自濱飾詞招  
名賢家事非易代堂堂正學公剛大邈無對哭聲震殿

廷成王問安在讀書真種子一字定千載諸公各成仁  
後先慷慨以慨官詎較尊卑決烈到草萊尚有補鍋翁姓  
名深隱晦魂遊騎列星同鄉卽共隊何時添栗主十忠  
得流輩此祠關名教後當虔釋菜相勗勵操修弗云行  
莫逮道學溯二徐源流明不昧好古重敦倫鄒魯風可  
再

錢武肅王鐵券歌用宋潛溪原韻

錢氏初定吳越基八都兵能生豹貔嗚呼唐末聚羣盜  
弱者先斃强者隨中原五代更八姓雖有遠略安所施

十國瓜分各竊據爭城爭地時盈虧南唐西蜀一黑子  
峩峩黃屋開彤墀廬陵作史劇歎息衰世典籍慵繙披  
就中錢氏稱忠孝五王三葉承弓箕始終保障十三郡  
縱有稗政無大疵民安耕桑兵不用厥後接跡佩銀螭  
一片鐵瓦亦怪偉鼎出泗水堪存疑淳化元豐及洪武  
三登玉殿覲衮衣其文三百四十字黃金嵌畫縈鬚髭  
詰辭莊重字古雅儼對彝器神爲怡當時霸業雄兩浙  
酣歌四馬行瑤巵宏乎昌乎爾猖獗婆留視爾如捕狸  
山號功臣樹衣錦斗牛無孛人無欺西湖王氣何必占

納土早識香孩兒腰鼓城壘却悍敵智有晏嬰勇虎癡  
萬弩臨江潮水退鐵幢鎮海大名垂券是乾寧二年錫  
爵列郡王官台司天冊荒草道觀作神鬼呵護仍無危  
入台世系有譜牒卿相冢墓鄉人知明初處士拜辭闕  
共羨野趣廷中麋諸公觀券詩滿帙劉宋逸興雲霞飛  
錢氏居台自南渡後少師榮國公忱奉詔大長公主高  
宗賜御書忠孝之家四字忱子端禮官參政孫象祖官  
丞相墓皆在台宋季兵亂券失于官河申元至順二年  
其孫世珪復得之明洪武二年以封功臣當遣鐵券遣  
使至台訪錢氏後處士尚德負至金陵呈御覽廷臣作  
詩者甚多而劉青田宋潛溪爲之冠宋有序言淳化中  
杭守臣嘗進之元豐五年我朝尚有鮑太守拂拭至  
又進是三登天子之廷也

寶欽元龜鐫梨剗棗載本末燦爛葩藻輝山陂

康熙初知府鮑

復泰刻表忠譜

我思漢世重寶氏祇爲天命識所歸錢氏後先

濟厥美不勞血刃功詎微至今錢塘甲海內殷繁都會  
稱通達忠懿鑄塔本瑣事猶傳弈禩銅花肥不然鐵券  
等閒耳叛將亦得邀皇闡懷光行瑜事可睹信誓仍見  
甲解纍功如李郭券何在簪紱寧延門祚衰獨留武肅  
姓字永龍蟠曲曲言如絲旂常竹帛遜汝壽幾閱烏兔  
東西馳偶見其物空吟咏猶覺落墨含餘威試問臨安  
之山有石鏡曷勿爲作磨崖碑

烈墳歌

臨海侯葬門之會祖明末爲將戰死海東史志俱佚其事鄉人故老往往能詳言顛

末烈墳卽

埋骨處也

虎風長嘯谿谷海鯨吹浪高于屋環山帶海剩孤墳  
名姓何曾寫青竹靈江東接扶桑天鯨帆銜尾過墳前  
神燈紫綠夜千點星星照耀山便娟白楊泣風秋更早  
駭螭跋獸眠深草故老猶能雪涕論斷頭將軍身手好  
莫愁湖上唱無愁鐵鎖江心木柿流韓擒徑逼橫江壘  
齊將誰燒卽墨牛沙蟲猿鶴同屍贅下城那用酈生說  
獨松一戰壓皋亭牙幢纔豎降幡繼當日將軍百戰勞



戟髯竿髮怒橫刀，裹創甲透千鈞弩。灑血絳殷五色縹，  
滄溟倒景天懸鏡。樓船五兩南風正，鼉鼓鼉風跋銀濤。  
道是崖門還未定，橫梁悲歌海外詩。虞淵不返更何之，  
海山時向啼鵑拜。歸去分明譜恨辭，殷頑蠢動仍招集。  
田橫島上殘軍葦，夸父何堪逐日車。水仙自道登雲笈，  
旗轉金鼇度玉環。天兵圍合陣如山，礮火無煙鼓  
聲死。四面雷呼速破蠻，自古將軍稱大樹。樹邊竟是埋  
身處，丈八蛇矛左右盤。空傳樂府陳安句，文孫文采風  
流甚。千篇著作琳瑯鏤，聲名藉藉滿長安。宏農彩筆黃

門錦好續碑文請鉅卿墳前百尺重題名往事何嫌吠  
堯犬褒崇忠節是

皇清

錦石歌

陳丈苴君聚小石百數枚文采可愛蓋自荆渚  
夔得於峽中者余因杜詩有錦石小如錢之  
句爲作是歌

美矣哉案頭一握碎琅玕何以盛之白玉盤斑斕五色  
遞隱現雲霞組織無倪端駁文雪浪未足喻以手玩弄

坐長歎陳君嗒然笑教予注目看來此數千里行經十  
二灘蜀道雖云難江行洵奇觀怪石萬狀自古說青天  
一線縈巖巒上有瞿唐灩澦湏如象如馬之崔嵬下有鹿  
角狼尾懸空倒瀉之飛湍黃牛旌旗杜宇鑿喧厖水石  
怒相搏傾崖坼岸日激盪萬古展轉那得安楚江故自  
蜀都下濯成錦色隨潺湲天孫支機此其亞晶瑩膩滑  
儼彫刊昔歲扁舟溯荆益篙師百丈牽絕壁楚臺日暮  
猿愁人屈廟秋深烏送客懷古高登白帝城悲歌醉入  
羅含宅霸圖文藻兩浮雲嗟哉滿望都陳跡但逢好處

定收帆下船自著尋山屐錦石紛紛洲渚多腳踏崑岡  
眩圭璧龍澄所棄我取之餅餌何須小兒易金藏祕本  
縱未窺袖中已飽元章癖當時一一經選擇今日堆盤  
尚能識赤甲白鹽赤白分歸州大沱青紫文虎牙紅質  
間素縷明月娟娟靄薄雲其一參差點星斗臥龍八陣  
排奇耦其一虹霓繞蔚藍巫山神女雨初酣其一涇濛  
鬱蒼翠琵琶峽裏思眉黛其餘黃者來玻瓈青者雜出  
巴東西眼底璘璠各可辨耳畔猶覺子規啼我聞斯語  
發大笑杜公應可眞詩料書齋作供清且奇不數星池

及員嶠君話遠遊我神遊亦從夷陵趨夔州縮置几席  
一拳耳硯池擬作三峽長江流座中一客勸我且椎破  
其中定有印篆大書忠孝侯

新昌道中

窮窳溪山畫不如行遊況值雁來初霜前隴色開茅屋  
煙外春聲度筍輿竹筧引泉分雪灌麥畦梯壁帶雲鋤  
劉門道是劉郎宅風物真疑漢代餘

劉門山

赤城猶在碧峰南曉霧渾疑夢裏探難得天雞呼海日  
但看風竹寫空潭煙霞枕席人千古鐘鼓晨昏佛一龕

應笑郵亭迎過客勞勞來去幾停驂

天姥寺

會墅嶺上望沃洲山

登嶺無冬夏嵐氣冷虛空今來稍晴暖江樹含空濛南  
望天姥岑嵯嵯白雲中逢僧話沃洲指點前山東列嶂  
海湧濤鼓盪隨颶風奔崖躍神駿老樹森高狎養馬放  
鶴人遙遙想支公未知王許後遊眺誰復同郵亭無別  
徑且問煮茶翁

剡溪舟中曉望

迎棹花能笑臨風水亦香好山如謝傅啼鳥憶王郎若

淪三霄露帆隨九曲湘最憐殘月影沙瀨白於霜

越城懷古

海內蓬萊是越州畫屏中臥鏡中遊家家接檻連青雀  
日日開簾對白鷗蟹舍曾懸明月夜菱田標颭夕陽秋  
我爲一曲思狂客煙水微茫何處求

山陰

鏡中看竹樹人地總神仙白玉長隄路烏篷小畫船有  
山多抱墅無水不連天朝暮分南北風猶感昔賢

禹陵

明德千秋遠心傳二帝參成功平水土留骨鎮東南梁  
且飛天去窈猶著地含翠微靈穴在金簡問誰探

陟方仍不反覆釜此山前地祇因農畝人曾教鳥田朝  
宗江口日清晏海年年迴首蒼梧暮零陵隔楚煙

篠簜敷村落高山拱廟門八年萬世賴四隩一坏存雲  
物瞻龍馭祠官職駿奔慕歌揚盛德終古此乾坤

### 遊開巖寺

巨靈劈太華截業留僊掌台山亦異哉長臂作幻象高  
巖自剖分足跡尚悄恍

俗傳唐時有長臂僧異跡

兩崖對鬱蟠磊



磊數千丈青天似琉璃下與溪流漾我來憩招提散步  
得清爽竹樹滿四陂風來振奇響無酒詎攢眉吟看林  
月上

繞門山

疇謂天工奇人巧亦不讓君看繞門山峭壁列屏嶂厥  
初本崕嶠斲出生面創採伐窮日夜骨立神愈旺危崖  
高天歆側厰層雲傍山腹藏堂皇外郭元相向彭觥斧  
鑿聲數里因風颺響應連四山萬和隨一倡盤旋螺文  
中含胡振罍益俄驚大聲起雷硠劇雄壯丁丁遠可聞

砢削近偏忘小橋遞彎環舟行過其上依稀彭蠡口窾  
坎鳴巨浪金奏在窟室人面朝青嶂峽束神禹開池護  
吳王葬樑欒想石城剪刀移雁蕩屈曲遶垣牆莓苔添  
色相新痕冰雪侔舊痕圖畫伉風日所薰蒸霖雨幾滌  
盪遂令受采質丹黃寫萬狀老松冠其巔華蓋鬱在望  
下有竹千竿森森立兵仗村居皆石屋老幼總良匠自  
古仰衣食山故無盡藏造遍越中廬埋遍越中壙道路  
樂平坦楔棹睹高亢股削豈有涯勝槩彌難量安知百  
年餘不作吼山樣

吼山亦石宕也

顧語同舟客斯遊亦云暢美

酒旣以沽手杯且莫放

遊普門寺之明日遊寶興寺

春光無遠近山寺自西東細路分苔綠高樓壓樹紅昨  
聞雞唱處今在鳥聲中一笑清煩慮非爲訪遠公

憩吳山丁仙亭喜其巖石奇幻

清晨登吳山探奇選邱壑不意飛來峰又飛入城郭有  
亭名丁仙千載想控鶴怪石湧峻嶒變幻誰造作遠視  
崢嶸并近觀形態各夷者羣玉平峭則太華削缺疑萬  
戶修隘必五丁鑿玲瓏嵌空虛對人勢欲落色皆含晶

瑩黯淡雕月魄驚濤濺龍門寒風結洛澤衡陽火雲起  
出岫未離腳巨靈信工巧道流善棲託能於繁華地幽  
寂藏卓犖真山乃假山堪愛更堪愕時俗喜喧闐此間  
絕屢屨望望西子湖簫鼓紛行樂登峰發長嘯江天睇  
寥廓

岳王墓

鄂國祠堂孤嶼中乾坤坏土覆精忠丹青影閃旌旗電  
松柏聲呼鐵馬風今日象姦重鑄鼎當時因鳥故藏弓  
樂生去國人休歎不過從前百戰空

憐忠祠二首

祠卽忠肅公故第遺井尚存因感異夢寤而賦  
此

祇剩祠堂屋數間樓臺原不占湖山萬靈迴首風雲壯  
一將成功天地間但使匈奴資塞走便看所養御王還  
趙家往事傷南渡誰救中原戰血殷

欄干一曲轉荒坪匡復功寧數奪門未賞子魚安宋國  
偏憎叔武及元咍忠泉有水皆成碧噩夢隨人尚說冤  
不朽精靈依梓里涼颺六月畫旗翻

花神廟像設甚工戲題

金鈴殿角響丁冬羯鼓聲連蕭寺鐘  
楣是辛夷牆薜荔袍如楊柳面芙蓉  
人間湯沐環山錫天上桓圭翦葉封  
木客竹郎俱遜爾登階先撫大夫松

發武林別家兄

欲說又無語將離各自看曉雲千嶂溼  
春雨一帆寒遠送承兄愛揚名怯弟難  
高堂如見問眼認是平安辭家渾不覺  
此日始關心徒手游京國扁舟出武林  
何曾穿鐵硯且擬碎瑤琴念我高岡陟  
時須寄好音

觀音山呈閔廉風團冠霞王梅泝汪槐塘諸同遊  
層巒迴抱上方幽矯首長江天外浮紫竹有林開覺苑  
絲花何地問迷樓白遮一片雲如夢黃蘗千村麥欲收  
啼鳥聲中春已老自憐爲客滯揚州

守閘

閘河却類上天梯寸步推排未易躋百丈徐牽魚貫進  
半灣仍齒雁行齊水從竹節分流澀風羨鳥竿拂岸低  
世路宦情渾一概倚窗聊與狎鳬鷺

秋半先愁水欲冰坐看津吏守魚簪朝朝暮暮前村樹

雨雨風風隔岸燈盤轉路如行磨蟻乍開船似脫鞵鷹  
因思海運真良策空闊雲帆快翥騰

但逢水到自成渠若計郵程兩月餘船小敢乘千里浪  
心閒可檢十年書長江雪峽多危柁平地紅塵有覆車  
較是閘河移泊穩乾坤一笑總吾廬

滕縣朱姬莊隄上望湖

登岸便翛然漁舟沒遠天蒲吟風作雨蘆吐雪如煙編  
戶營淮屋燒畬學楚田此間秋最好湖目不論錢

岳麓碑



昔聞岫嶠神禹碑今見岳麓蝌斗篆丹文綠字信奇絕  
韓公誤索寧非舛揭來墨本太古色半帶煙霞半苔蘚  
體勢怪偉渾莫名書符道籙形模儼陰雲迸裂電天矯  
崩崖怒觸浪盤轉方圓流峙陋玉筍濃纖錯落嗤金翦  
魚龍火鳳似兮非蟲蛇鳥跡想未遠憶昔昏墊想懷襄  
禹作司空帝所遣躬乘四載疏百川冀雍梁豫青徐兗  
荆揚南服次第成手與洪波爭畝畝神聖自有神靈助  
扶江坐看黃牛喘宛委探藏穴得劒事類洛龜理難貶  
九山刊旅岳最尊衡陽應見瓊函顯七十二朶青芙蓉

岳麓一峰稍回遠若禪梁父封岱宗豈必祝融號孤嶢  
祇承於帝承其辭咨汝輔佐羅冠冕清湘九曲匯洞庭  
黎苗舊俗隨風倦曾拜蒼水授開山忍看頑石阻孤巘  
庚辰斧學巨靈擘伯益夷堅妙記謨倚天絕壁書成功  
文章渾渾極粵衍摹勒宜屬共工鐫吉日定是羲和選  
鬼物呵護千萬年置谷沈淵笑襄岷吁嗟滄海幾桑田  
唐虞剩簡無畫點岐陽十鼓剝闕多嶧山片碣行數鮮  
詛楚石刻本姦詐搜尋不憚陟幽險周秦遺事尚可珍  
何況席上陳瑚璉九鼎飛去碑獨存明德遠矣吾爲緬

璜玉已共龜蒙亡小正幸存大戴卷天留異蹟鎖空山  
崎嶇林壑重重掩江分三九且茫昧穴有東西紛詰辨  
淳化帖亦摹數字祇將漢隸遙增減歐趙諸人錄金石  
未及斯碑深足忝刊缺真同追蠡鐘斑爛飽歷雲嵐染  
蒼頡古文久不傳後儒考證喜粗淺遂使神筆淹巖巒  
至今音訓誰能闡軒轅當日隱衡山定自摩挲歎盡善  
惜哉不解人間書走乞韓歌補謨典

題于清端公單騎赴任畫冊

于尚書成龍督兩江  
時赴任但騎一馬見

者不知爲  
總制也

曾傳于謹赴朝叅廉從無過騎兩三千載文孫持虎節  
一僮一馬向江南

鄭筠谷前輩以足疾請假歸浙

誰于未老乞身閒共羨清高不可扳偶自下堂同樂正  
便容抽笏臥香山尊鱸況得秋風便猿鶴知迎逸客還  
祖席持觴先訂約他時來訪白雲關

早聞經學踵康成館閣文章更有名扶杖詎妨朝謁地  
拜章求遂退閒情廿年宦況惟書富一曲湖光比鑑清  
此去秋山紅樹外籃輿遊可倩門生

送汪荇洲師致仕歸里

引年拜疏出 皇都不羨西京二大夫  
行輩一時推魯殿文章千載有臯謨  
頻持霄漢衡材尺自畫江湖注海圖  
此日國門看祖道公卿垂白總生徒

集杭堇浦寓齋看丁香花得十三覃韻

友朋懽聚亦有數一年花事幾春三  
清晨杭子折簡至紫丁前日香猶含  
夜來疎雨點萬萼洗出塵土凌煙嵐  
鮮新兩株類交讓爛熳文采射書龕  
坡妻久藏一斗酒幼度舊釣鯪一坭  
已招同志五六子君如有暇來相探

狂喜倒衣便命駕不愁路滑嘶蹇驂憶昨沈萬遊城南

邀我同矚黑龍潭

徽園葆青以前六日  
攜酒城南看杏花

汀蘆出水苗短

短隄柳拂檻絲鬢鬢惜無好花供醉眼柱頤但數青瑤

簪是時杭子鎖試院手執繩墨程梗柟諸公行止各未

定或鍵雙戶驅銀蟬

謂胡稚威周圍  
牧周尚宮諸子

遠者尚作津門客

加餐長憶題封函

謂汪槐塘張少儀  
萬柘坡諸子

今日何日此會集雨

晴還羃雲曇曇庭前花朵亞坐席成叢旖旎香醺醺紺

袂欲舞寶璫顫潑眼已覺春風酣脫畧竟知誰是客取

樂那問家無儋在座胸次總磊落放懷千古恣雄談博

物數典僑與郊怪羅螭鼎交虬盒袖中五色新樣錦天  
孫杼就園客蠶主人意興劇傾倒珍珠滴瀝瀉餅飮具  
饌速呼識字婢傳杯卽喚卷書男對花淺嚼何清甘雕  
梁語燕雙呢喃座中總是江南客此際風物彌堪耽市  
匳輕紅欹水閣蒙茸新翠環松菴鱸魚莼菜縱未熟溪  
登肥鰕田登蚶石泉朝汲煮玉版露芽夜焙封筠籃侵  
堦每嫌苔厯錄破夢尚恨鶯嬌慙山翁野叟時過話牛  
祖桑扈師周聃自顧世務百不諳也褰朝衫備朝叅花  
如解語得無笑沾戀歲俸寧非貪諸公武庫森長欽排

突文陣隨所戡卽今名譽騰輦轂藉藉太學推張彪驕  
驅逸足輕萬里肯與駑馬並馱馱呼燈照花更浮白樂  
甚一石吾能堪仰天大嘯雲半捲霽月輝漾天蔚藍

寶綸堂詩鈔卷二